

MEC MISSION KÔ 50 CHAKAONA SAIPAZINA

M. Vahnei

Mara Awnanopa ta Mission chakaona châh vaw pahno pathao ta, avaw chakao pathaona tawhta eima khitlyna cha kô 50 tlai avaw tah haw. Chakaona a vaw pathaotuatuhpa thokha hluhpizy cha eima hry ta y khao vei ei.

Palôhlie chhieh kawpa hmo hluhpi a y. Râhzohpa byh apia ta khito chahryhkheipa zy, nô hluhpi ta Vâko, Sawlai, Khumi tahpa awpha ta thlah ama chhâna ao zy, Myo râh Mawithong khieh liata M.I.E.C, 9-4-69, Myethle khieh liata M.I.E.C, 3-3-70 tahpa lôbô parohpazy, " Eimâ châ thei lymâ tyh aw." R.P. Lawbu, Kô 52, Apahâna 8th January, 1975; " Eimâ châ thei lymâ tyh aw" Evangelist Zasia, Kô 32, Apahâna 11st December, 1969; Evangelist Biepô, Kô 32, Apahâna 27th December, 1986...tahpa zy hih, palôlie âchhieh ngâsâ. Chakaotuh hmiatuapa zy cha ama pheitly tuachaina râh liata atlytuhpa âmo moh achalua chhuah tiarâh leipa ei ta, M.I.E.C moh tlaô ama chalua hbaô.

KTP, KNP, Awnanopa khieh kha nata py kha zy ta Mission Christmas Gospel Team ama sie tyhpa zy, Puhpa Ebi nata KTP sahlaozy ta loudspeaker apia lymâpa ta Khumi râh Gospel Team ama chahryhpa zy vâ âchhieh ngâsâ hra.

Palôhlie chhiehpa, vâchhiehpa zy a ypa hawhta pahneichhiehpa hmo zy chhao a y hôlô hra. Khi kha liata ngiapâtuha dâh achapia tlamaw ta, chahryna nata pathlâna cha chaori tlaï ta chahrypa ta, Rev.... ta za chhitha ta, Rev.... ta chaori apathlâpa zy, khi kha liata Christmas noh my daihti Apakhy khai, Christmas pati dôhkhoh khai tawhta Christmas hla hnei khao leipa ei ta, loudspeaker ta Pinô Ngôdei nata Pinô Saidi hla ta Christmas daihti phapa ama hmâpa zy cha pahneichhieh kawpa achâ heih hra.

Kheiharaichâsala, eima Mission chakaona zy tawhta eimâ phana rakha ta saipazi heih tua ei sih la.

MARA AWNANOPA MISSION Â NANONA PATLUANA NATA CHÂNA (THE UNIQUENESS AND IDENTITY OF MARA CHRISTIAN MISSION)

1. Mara Awnanopa cha Biehraï Siku zy liata Mission chakaona dâh achuna sâhpa (missiology) a vaw chu ha tua ta, missionary training kiah ha tua ta, Plan sianô kawpa tao ha tua ta Mission chakao pathaopa châ vei. Krista liata ngiapâna, hnabeiseihna nata kyhpachâna ato hrpa cha apahnona dâh hawhta nah ta, ataothaina dâh hawhta pahnokhei ta, vaw chakao lymâ ta, kô 50 eima kaw sie thei thlah haw. MEC Mission cha achu ha tua ta, planning tao ha tua ta chakaopa châ leipa ta, chakao ha tua ta, ahnoh lâ ta achu chhyhpa Mission achâ. (MEC Mission exists (being) first and then it defines itself later).

2. Ahrana ta thlahpa lâ thapasana palôh mei hawh pa-ia ta, eima chheipâh chi hro, pho hropa zy chhao Krista amâ vaw ngiapâ hra awpa saiheina laikawpa a hnei. Cha saiheina (thapasana) cha ykhei molo thei lei awpa taihta pasuapalâ ta, eima chheipâh chipho zy lâ ta atuah papua. Marasaw zydua ta eima pasô chaipa, eima lykhei chaipa, eima hneina khô lâ taihta eimâ pie pasaikhei theipa cha Mission chakaona he châ ta, *Mission he Mara Awnanopa ta eima kyhpachâ hmiatua chaipa a vaw châ.*

3. Marasaw ta khitlâh ryureina kyh, py kyh, politics kyh zy liata apôhkha ta palôh raoh aru kaw tyh. Anodeikua, mission chakaona kyh lia ta he cha tlokhuh eima reiraoh ta, eimâ pôhkha kaw. ***Mission chakaona he Marasaw eimâ pôhkha chaina kyh achâ.***

4. Hawti machâ, chanô chapaw, alai achyh, eima zydua ta eimâ phiapahrikheipa, zawpi ta eima buakheipa nata zawpi eimâ tliehkheipa achâ. ***Mission he Marasaw zydua tha papuapa (Mass movement) raihria achâ.***

5. Mission chakao pathaona daihti kha eima chheipâh chipho zy nata khizaw hropa azaona phapa hnei leipa pita, keimo deita ta eima y patluana daihti (isolated) a châ. Mara zawpi palôh liata keimo Awnanopa ngâlâh khiah ma khizaw lia y pi tahpa palôh phao eima hneina daihti achâ. Mission saiheina nata thlahpa thapasana padâhsa thei awpa bie tlyma, pachâna nata apyhna tlyma, pachuna tlyma khôtho lâ tawh â vypa y vei.

Eimâ nuapa chyhna nata chipho zy chhao kha Buddhist zyhna lia thari vaw thla hmâ mâh leipa ta, Krista Thâtipha chi rie nawpa ta lei pha kawpa hawhta avaw châ. Buddhist zyhna a vaw pyh hmâ ha mawh ei sala, Thatipha chi tlana aru ngâsâ ha bâ aw. Sawkhâ ryureina kha Socialist sawkhâ thatlôna âla pathao haina daihti châ ta, zyhna lâchhâh he Socialist achâna hawhta uasa vei. Sawkhâ chyhna nata pheisah ryureina zy ta Mission chakaona vaw patyhpamâ tu vei.

MEC Mission cha adaihti ta liata pathao ta, chakaopa a vaw châ.

6. Biehai Thiehpâ Awnanopa eimâ chu tita, Zisu Thyuheihna angiapâ hmiatuapa, Krizyh hmiatuapazy kha he khizaw liata Awnanopa padua ta râh pakawh awpa pachâna hneipa lyu vei ei. Krista cha thlai â vy awpa ta hnabeiseih ei ta, "Maranatha" tahpa ta ama aw tyh. Daihti sie lymâ ta, Krizyhpâ maluh pôh via lymâ ta, Krista hra ama hnabeiseihpa hawhta thlai a vy leipa ta, cha tawhta cha Awnanopa tôtlâh nata avaona dâh zy patohpatia chhyhpa a vaw châ. Chavata Awnanopa he cha khizaw liata pina dâh âdo leipa (apipasipa) hawhta reipa achâ tyh.

Mara Awnanopa ta Mission a vaw chakao pathao no kha Awnanopa py padua achhuahna tlyma, Awnanopa râh pakawh chhuahna tlyma vaw hnei cheita vei. Zisu â vy heihna cha ahnia kaw ha bâ ta, Krista pahno leipa zy ta Krista vaw pahno ei sala, Kri ama vaw zyh awpa deita kha anuapa a vaw châ. Hria hmâna daihti chhao y khao leipa aw ta, hria chatlie byuhpa ta angiapâpa châ ta, aparaparô kawpa ta vaw hriapa avaw châ. Chavâta Kri a vaw zy tuapazy chhao kha Anglican Awnanopa zy lâ ta ama vaw pie thlâh haw.

Daihti vaw sie lymâ ta, Zisu thlai a vy mâh khao leipa ta, Krizyhpâ maluh vaw pôh via laih ei ta, paryhpapaoh chhielie leipa ta local church zy padua ta, Awnanopa tôtlâh zy, achhihthana nata amohôhna dâh zy taochhyh vaw byuh ta, Mission liata Awnanopa padua nawpa dâh vaw saipathu tu leipa ta, Mara Awnanopa amohôhna dâh, avaona dâh, tôtlâh zy tlâ patly (copy)pa ta Mission liata Awnanopa local zy eima vaw padua. Ti nah tlâh, chipho alyu leipa zy ama vaw châ nah ta, daihti vaw sie laih ta, Awnanopa moh kyh zy lia chhao ta ngiaryh chhih leipa â vaw zie pathao laih haw. (*He rairuna kyh he tho hmiâ lâ liata eima sai pazih via aw*)

Mara Awnanopa Mission cha Awnanopa py padua awpa he â chhuah chaipa vaw châ vei.

He liata palâsapa zy he Mara Awnanopa Mission ânano patluana (distinctiveness) hawhta ei pahno. Eima Mission achâna (Identity) hawh chhao ta ei pahno.

He eima châna, eimâ vaw nanona (Identity and distinctiveness) tawhta kô 50 chhôn eima chakaona mission he eima sasyh athlipa ta eimâ moh pasia tua awpa aphapa ta ei pahno.

EIMA CHÂNA AMO PASIANA

TDRCH: SWOT ANALYSIS

T- Thatlôna; S- Strength

D- Dadiehna; W- Weakness

R- Rypaohna; O- Opportunity

CH- Chichhihpa; T- Threat

A. THATLÔNA (STRENGTH)

1. Marapa 100 liata 100 Krizyhpa eima châna
2. KHP, KTP, KNP, zy nata Awnanopa ta vâtlâh raihria awpa (Common Cause) ta eimâ pyh pa ipa.
3. Notla Mara nata chhônkhaw (Awnanopa liata) ta eima hriaparaoh theina
4. Evangelical Faith (Thâtipha Aduakhei khohpa Ngiapâna) nata Ahrana (Revival)
5. Su pipa miakha tawhta syhpahlypa Awnanopa Avaona (Centralization)
6. Marasaw zawpi aphiapahrikheipa raihria ta ngiapâna (Mass Movement)
7. Mission liata hria awpa ta âpie pasai theipa hriatuhpa daihty leina
8. Biehra liata thari thla pathupa ngiapâna
9. Overseas liata MEC Local Church zy aypa nata Overseas Local Church member zy cha thyutliapa, raihria theipa ama châ chypa

B. DADIEHNA

1. Strategy nata Plan sianô kawpa hnei tua leipa ta chakao pathaona
2. Theological trained hmeiseihpa zy Mission hriatuhpazy châta pachhuahpanoh leina
3. Hriatuhpazy amâ daihna rakha ta deichhyna hlao pie thei leina
4. Assembly nata Constitution liata Mission liata local church zy avaona dâh athlâzi leina nata sianô leina
5. MEC Pastor zy ta amâ chuna Theological Colleges zy tawh a vaw chu patlô ei ta, mission saiheina ama vaw hnei pasa tu khao leina; Pastor zy mission saiheina dâh nata Awnanopa zawpi mission saiheina dâh liata âkao (ânôvah) thei leina
6. Tao tyhpa hleikhô ta zawpi palôh athieh viapa ta hria thei awpa chakaona thiehpa nata chi nanopa papi thei leina
7. Mission liata ngiapâtuha zy ama nohto thlahpa hro, khitlâh hro (social service) kyh zy liata padua thei lei na
8. Awnanopa zawpi nohto niebaw busai adôkhâ leina nata chakâhna
9. Mission liata hriatuhpazy amâ ngiapâna hro pathieh pathi heihna nata thlahpa hro pathieh pathi nawpa program y leina (e.g. Sabbatical Leave or others..)

C. RYPAOHNA (OPPORTUNITY)

1. Mission eima chakaona su liata chyhsazy cha chi heih khapa (Chin chyhsa) ama châna
2. Buddhist zyhna ta a vaw pahnie pha hmâ leina
3. Democracy sawhkhâna ry liata zyhna kyh khotalaina alaiseih lymâna
4. Mission chakaona kyh achuna nata apathieh nawpa ta LTC Awnanopa ta ahneina

5. Lâpi, azaona (communication) pha viapa eima hnei via lymâpa
6. Myanmar sawkhâ thiepha ta Chin State a eihrà viapa ta mohôh chhuahna, Vice President, Center liata Biehneina apatutuhpa zy hry ta Krizyhpa amâ pahlaohluhpa (Krizyhpazy- Vice President, Amyotha Hluttaw (Upper House) Speaker, Pyithu Hluttaw (Lower House) Speaker,....etc...)
7. Mission liata Awnanopazy ama duahmo paryhpapaoh awpa ta hnabeiseihna lai kawpa ama hneina

C. CHICHHIHPA

1. Mara Evangelical Church tahpa 'Mara' liata chipho hropa Myo, Khumi, Laymyo, Asho, Lythu,etc.. ama ngiaryh patlô aw vei. Evangelical cha ngiaryhkhei thei aw ei ta, 'Mara' tahpa he la âmo châta thâtih phapa châ thei khao aw vei. Myanmar liata apahrâpa chipho 135 liata chi noeihpa ta pahnokheipa chipho zy ama châ tlôh hra.
2. Mara tahpa hawhta ama chipho moh chyu ta Awnanopa moh bi ta paduapa achâ khiah MEC Mission cha apôhkhana mission hlâta py pahluhna mission a châ aw.
3. Assembly ta Mission liata Awnanopa zydua pahly sala, Awnanopa miakha ta ngiaryhkhei theipa Avaona dâh nata mohôhna dâh atao thei vei khiah, âmo sasyh amohôh thei mâh leip'aw ei ta, amâ hnia viapa lâ ama paipatla thei aw.
4. Awnanopa zawpi liata Mission thapasana nata saiheina padâhsa (padiasa) thei awpa pachuna zy
5. Ma Ba Tha (Protection of Race and Religion Py) âhnawna hawhta Hluttaw ta passed ta, August 26, 2015 ta President Thein Sein mo sign ta apa-i hapa Zyhna apanano theina (Religious Conversion Law) Mission chakaona liata rairuna atlôkhei thei aw.

He liata palâsapazy he keima mo pakha saina dâh tlâ châ ta, A tawhta CH taih ta baichha via theipa, pachyh via theipa châsala apha.

Eima Thatlôna, Eima Dadiehna, Eima Rypaohna, Chichhihpazy he liahsa amohpakia ha tuapa ta, he eima duahmo dopazy khâchâ patu hapa ta, hmialâ kheihtha eima sie aw? tahpa he Mission Golden Jubilee eimâ hmâkheipa châ thei sala.

MEC Mission Apathaotuhpa Khazohpa ta Achhâna taih A chhihtha cheingei aw tahpa he la noraihna hnei leipa ta, angiapâ thlâh ha ei suh u.

Ei châ ly kaw ei.

Nama chakaolâhpa viasa,

M. Vahnei (Rilipaw)

Yangon, May 23rd 2016